

PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS

PERTANYAAN : LISAN

DARIPADA : DATO' SERI DR. AHMAD ZAHID BIN HAMIDI  
(BAGAN DATUK)

TARIKH : 24 OKTOBER 2019 (KHAMIS)

**SOALAN**

Minta **MENTERI PERTAHANAN** menyatakan adakah terdapat sebarang keperluan perubahan *Standard Operating Procedure* (SOP) bagi sebarang pertunjukan bersenjata yang dilakukan oleh pihak Angkatan Tentera Malaysia susulan daripada kematian seorang pegawai tentera tempoh hari.

**JAWAPAN**

Tuan Yang di-Pertua,

Terlebih dahulu izinkan saya untuk menjawab pertanyaan ini secara bersekali dengan pertanyaan-pertanyaan oleh enam (6) Ahli Yang Berhormat (YB) lain yang telah membangkitkan isu berkaitan kejadian nahas semasa menjalankan tugas yang telah menimpa Allahyarham Mejar Mohd Zahir bin Armaya seorang pegawai komando dari Rejimen Ke-11 Gerak Khas (11 GGK) pada 4 September 2019 yang lalu.

Yang Berhormat-Yang Berhormat yang membangkit isu ini ialah YB Libaran – pada tarikh 31 Oktober 2019 (pada soalan no.27), YB Bukit Bintang – pada tarikh 12 November 2019 (pada soalan no.9) dan pada tarikh 21 November 2019 pertanyaan-pertanyaan oleh YB Kuala Krau, YB Kota Bharu, YB Jelebu dan YB Jelutong masing-masing pada soalan no. 10, 12, 14 dan 36.

Pertanyaan-pertanyaan Yang Berhormat-Yang Berhormat telah menyentuh pelbagai perkara berkaitan kejadian ini seperti *Standard Operating Procedure* (SOP) latihan yang digunakan, hasil siasatan nahas, langkah-langkah pencegahan bagi mengelakkan kejadian tidak berulang, isu peluru hidup yang digunakan semasa latihan/demonstrasi, standard baju kalis peluru yang digunakan dan bantuan yang dihulur kepada waris.

Tuan Yang di-Pertua,

Suka saya jelaskan *Standard Operating Procedure* (SOP) latihan dan arahan keselamatan yang telah dikeluarkan oleh Angkatan Tentera Malaysia (ATM) adalah terperinci dan menyeluruh dalam menjamin keselamatan latihan. SOP yang digunakan merangkumi aspek pentadbiran, pelaksanaan, keselamatan latihan dan demonstrasi yang dilaksanakan. Namun demikian, pihak Markas Tentera Darat telah menubuhkan sebuah Lembaga Siasatan pada 4 September 2019 (hari yang sama kejadian berlaku) bagi mengkaji, menilai dan meneliti secara menyeluruh semua aspek SOP latihan dan sebarang keperluan bagi mengelakkan perkara ini dari berulang. Pada 26 September 2019 yang lalu, Markas Tentera Darat telah mengumumkan keputusan hasil siasatannya, dimana Lembaga Siasatan mendapati insiden berkenaan diklasifikasikan sebagai kejadian terencil dan ianya merupakan kemalangan semasa latihan. Pihak Lembaga

## NO SOALAN : 4

Siasatan juga mendapati peralatan dan kelengkapan yang digunakan semasa latihan tersebut berada dalam keadaan baik.

Sebagai maklumat Dewan yang mulia ini, dalam gimik demonstrasi semasa kejadian berkenaan, SOP latihan yang digunapakai adalah Prosedur Tetap Latihan - Bab 5 Seksyen 21 - *Confident Shooting* dan Seksyen 22 - *Body Armour Confident Shooting*, dengan penggunaan peluru hidup. Penggunaan peluru hidup sememangnya telah dilaksanakan oleh pasukan khusus serata dunia. Latihan seperti ini jelas dapat melahirkan anggota Gerak Khas atau pasukan khusus yang kompeten dan berkeyakinan tinggi untuk menghadapi operasi khusus terutama semasa operasi menyelamatkan tebusan dalam situasi "*hostile*".

Dari segi risiko latihan menggunakan peluru hidup, pihak Kementerian tidak menafikan risiko yang terdedah kepada anggota yang terlibat dengan latihan sebegini, namun ianya adalah setimpal dengan hasil yang diperolehi berdasarkan kemampuan 21 Grup Gerak Khas menyediakan pegawai dan anggota yang berkeyakinan tinggi dan bermotivasi untuk terus melaksanakan misi-misi khusus dan strategik negara. Justeru itu, latihan sebegini akan diteruskan bagi mengekalkan dan meningkatkan kompetensi pasukan khusus. Namun begitu, seperti yang telah saya nyatakan sebelum ini, pihak ATM akan meneliti semula SOP latihan melalui penubuhan sebuah tim khas untuk membuat penambahbaikan SOP sedia ada, agar kejadian yang sama tidak berulang.

Bagi isu baju kalis peluru yang digunakan pula, standard baju kalis peluru yang digunakan semasa demonstrasi berkenaan adalah mengikut piawaian *National Institute of Justice Level III (7.62 mm) United State*, di mana sesuai digunakan untuk operasi dan Latihan Tempur Jarak Dekat Tentera Darat.

Tuan Yang di-Pertua,

Pihak Kementerian amat prihatin ke atas nasib yang menimpa kepada waris dan anak-anak yang ditinggalkan. Bagi menghargai jasa yang telah dicurahkan, Allahyarham Mejar Mohd Zahir bin Armaya telah disokong untuk dinaikkan ke pangkat Leftenan Kolonel oleh Majlis Angkatan Tentera Ke-578 yang bersidang pada 17 September 2019, serta telah mendapat perkenan Seri Paduka Baginda Yang Dipertuan Agong. Manakala antara bantuan

## NO SOALAN : 4

yang telah dan sedang diusahakan bagi membantu waris dan anak-anak Allahyarham ialah:

1. Bantuan Pengurusan Jenazah sebanyak RM3,000 tunai daripada Markas Tentera Darat telah diberikan terus kepada waris bagi menguruskan jenazah Allahyarham.
2. Bantuan Tabung Amanah Perwira dan Pertahanan Negara (TAPPN) sebanyak RM22,000 akan diberikan kepada waris dan anak-anak secara *one-off*. Bantuan dalam proses kelulusan TAPPN.
3. Waris dan anak-anak Allahyarham akan menerima bantuan dari Skim Takaful Berkelompok ATM bagi khairat kematian sebanyak RM3,000 dan manfaat caruman skim dengan nilai seunit RM16,000, tertakluk kepada bilangan unit yang telah di carum oleh Allahyarham.
4. Faedah kematian yang boleh diberikan kepada orang tanggungan (balu, anak dan ibubapa Allahyarham) berdasarkan kepada Peraturan-Peraturan Angkatan Tetap (Pencen, Ganjaran dan Faedah-Faedah Lain) 1982 adalah seperti berikut:
  - a. Pencen Terbitan dan Ganjaran Terbitan (diberikan kepada balu, anak dan ibubapa);
  - b. Faedah Gantian Cuti Rehat (FGCR) (diberikan kepada balu dan anak);
  - c. Pencen Orang Tanggungan (POT) yang diberikan kepada balu ( $\frac{1}{4}$  daripada gaji akhir), setiap seorang anak ( $\frac{1}{24}$  daripada gaji akhir) dan ibubapa ( $\frac{1}{8}$  daripada gaji akhir); dan
  - d. Ex-Gratia Orang Tanggungan (EXOT) yang diberikan kepada balu ( $\frac{3}{5}$  daripada jumlah keseluruhan EXOT) dan anak ( $\frac{2}{5}$  daripada jumlah keseluruhan EXOT).

Sekian terima kasih.